

四庫全書

子部

欽定四庫全書

性理大全書卷十五

易學啟蒙二

原卦畫第二

古者庖羲氏之王天下也仰則觀象於天俯則觀法於地觀鳥獸之文與地之宜近取諸身遠取諸物於是始作八卦以通神明之德以類萬物之情

易有太極是生兩儀兩儀生四象四象生八卦

大傳又言庖羲畫卦所取如此則易非獨以河圖而作也蓋盈天地之間莫非太極陰陽之妙聖人於此仰觀俯察遠求近取固有以超然而默契於其心矣故自兩儀之未分也渾然太極而兩儀四象六十四卦之理已粲然於其中自太極而分兩儀則太極固太極也兩儀固兩儀也自兩儀而分四象則兩儀又為太極而四象又為兩儀矣自是而推之由四而八由八而十六由十六而三十二由三十二而六十四

以至於百千萬億之無窮雖其見於摹畫者若有先後而出於人為然其已定之形已成之勢則固已具於渾然之中而不容毫髮思慮作為於其間也程子所謂加一倍法者可謂一言以蔽之而邵子所謂畫前有易者又可見其真不妄矣世儒於此或不之察往往以為聖人作易蓋極其心思探索之巧而得之甚者至謂凡卦之畫必由著而後得其誤益以甚矣

朱子曰伏羲觀鳥獸之文與地之宜那時未有文字只是仰觀俯察而已想聖人心細雖以鳥獸羽

毛之微也盡察得有陰陽令人心粗如何見得或曰伊川見免曰察此亦可以盡卦便是此義曰就這一端上亦可以見凡草木鳥獸無不有陰陽王昭素云與地之間諸本多有天字俯仰遠近所取不一然不過以驗陰陽消息兩端而已太極兩儀四象八卦此乃學易綱領開卷第一義孔子發明伏羲畫卦自然之形體孔子而後千載不傳惟康節明道二先生知之蓋康節始傳先天之學而得其說且以此為伏羲之易也說卦天地定位一章先天圖乾一至坤八之序皆本於此然康節猶不肯大段說破易之心髓全在此處不敢容易輕說其意非偶然也明道以為加一倍法其發明孔子之言又可謂最切要矣節齋蔡氏曰聖人之卦精可以通神明之德粗可以類萬物之情神明之德不可見者也故曰通萬物之情可見者也故曰類雲莊劉氏曰易畫生於太極故其理為

天下之至精易畫原於圖書故其數為天下之至
變太極理也形而上者也必有所依而後立故雖
不雜乎圖書之數而亦不離乎圖書之數則圖書
之數以作易而太極之理行乎其中矣繫辭論聖
人作易之由又有及於觀察求取則雖非獨以圖
書而作其實因圖書之數而後決之耳太極為理
之原圖書為數之祖理之與數本非有二致也合
而觀之斯可矣玉齋胡氏曰仰則觀象於天即
所謂仰以觀于天文日月星辰皆是也俯則觀法
于地即所謂俯以察于地理山林川澤皆是也鳥
獸之文羽毛之屬地之宜草木之屬神明之德如
健順動止之性萬物之情如雷風山澤之象也朱
子云畫卦只是一分為二節節如此以至於無窮
蓋以凡一為極凡兩為儀所謂一者非專指生兩
儀之太極所為兩者非專指太極所生之兩儀兩
儀分為四象則兩儀為一而四象為兩矣四象分

為八卦則四象為一而八卦又為兩矣自
是推之以至于不窮皆此一之分為兩爾

易有太極

太極者象數未形而其理已具之稱形器已具而其理无朕之目在河圖洛書皆虛中之象也周子曰无極而太極邵子曰道為太極又曰心為太極此之謂也

王齋胡氏曰畫前之易一太極耳橫圖所該微象卦以至六十四者皆自此而生也象數未形者言圖書未出卦畫未立而其理已具者言所以為是兩儀四象八卦之理已渾然備具所謂不離乎陰陽之太極也形器已具者言圖書既出卦畫既立而其理无朕者言雖有是儀象卦之畫而其所以然之理又初无聲臭之可求所謂不離乎陰陽之太極也圖書虛中見前篇

陽儀

陰儀


是生兩儀

太極之判始生一奇一偶而為一畫者二
是為兩儀其數則陽一而陰二在河圖洛
書則奇偶是也周子所謂太極動而生陽
動極而靜靜而生陰靜極復動一動一靜
互為其根分陰分陽兩儀立焉邵子所謂
一分为二者皆謂此也

王齋胡氏曰朱子答程可久云如所論兩
儀有曰乾之畫奇坤之畫偶只此乾坤兩
便未穩當蓋儀匹也如俗語所謂一雙一
對云耳自此再變至第三畫八卦已成方
有乾坤之名當其為一畫之時方有一奇
一偶只可謂之陰陽未得謂之乾坤也

兩儀生四象

太陽一




少陰二



兩儀之上各生一奇一偶而為二畫者四
是為四象其位則太陽一少陰二少陽三
太陰四其數則太陽九少陰八少陽七太
陰六以河圖言之則六者一而得於五者
也七者二而得於五者也八者三而得於
五者也九者四而得於五者也以洛書言
之則九者十分一之餘也八者十分二之
餘也七者十分三之餘也六者十分四之
餘也周子所謂水火木金邵子所謂二分

為太陽木陽稱為少陽雖與此不盡合
其分太少陰陽雖與此不盡合
說以明水火木金為四象耳
或問云所謂兩儀為乾坤初爻四象為
乾坤初二相錯而儀則恐立言有未瑩
者蓋方其為兩儀則未有四象也方其
為四象則未有八卦也安得先有乾坤
之名初二之辨哉兩儀只可謂之陰陽
四象方有太少之別其序以太陽少陰
少陽太陰為次序既定連升而倍之陰
違得乾一兄二離三震四巽
五坎六艮七坤八之序也



四象生八卦

乾一 二 三

兌二 一 二

離三 一 二

震四 二 三

四象之上各生一奇一偶而為三畫者八於是三才畧具而有八卦之名矣其位則乾一兌二離三震四巽五坎六艮七坤八在河圖則乾坤離坎分居四實兌震巽艮分居四虛在洛書則乾坤離坎分居四方兌震巽艮分居四隅周禮所謂三易經卦皆八大傳所謂八卦成列邵子所謂四分為八者皆指此而言也

玉齋胡氏曰朱子云四象生八卦者太陽之上生一陽則為三而名乾生一陰

巽五
二


坎六
二

艮七
二

坤八
二


則為三而名兌少陰之上生一陽則為三而名震少陽
三之上生一陽則為三而名巽生一陰則為三
之上生一陽則為三而名坎太陰之上生一陽則為三
而名艮生一陰則為三而名坤所謂乾
一兌二離三震四巽五坎六艮坤八者
蓋謂此也圖書分八卦詳見前篇周禮
太卜掌三易之法夏曰連山商曰歸藏
周曰周易其經卦皆八也又按朱子
云太陰太陽交而生艮兌少陰少陽交
而生震巽坎離不交各得本畫坎離之
交在第二畫兩儀生四象時交了老陽
過去交陰老陰過來交陽便是震巽上
第三畫陰少陽交便是震巽上第三
畫所以知其如此者他這位次相挨傍
蓋以太陽過去交太陰則生艮上爻之
陽太陰過來交太陽則生兌上爻之陰
乾坤不言交而生者以上爻陽生於太
陽陰生于太陰於交之義無取也少陰
交少陽則生震上爻之陰少陽交少陰


則生巽上爻之陽坎離之交各得本畫
者離之上得陽儀之陽坎之離之上得陰儀
之陰亦非交而生也坎離之交在第二
畫生四象時交者陽儀交陰儀而生坎
中爻之陽陰儀交陽儀而生離中爻之
陰也此所以四象生八卦位次相挨傍者
交而乾坤坎離不交也位次相挨傍者
兌乾艮坤震巽六卦位次相挨傍者
盤澗董氏云自兩儀生四象則太陽太
陰不動而少陰少陽則交自四象生八
卦則乾坤震巽不動而兌離坎艮則交
益二老不動者陽儀還生陽儀之象陰
還生陰之象乃生陽之象也乾坤震巽
之象陰儀乃生陽之象也乾坤震巽不
動者陽象還生陽之象也陰象還生陰
離艮坎則交者陽象乃生陰之象陰象
成陽爻也此與朱子前說不同參互求
其義益備要之此皆就四象八卦已成
一齊俱定本非有俟于交而生也



八卦之上各生一奇一偶而為四畫者十六於經无見邵子所謂八分為十六者是也又為兩儀之上各加八卦又為八卦之上各加兩儀也


玉齋胡氏曰兩儀之上各加八卦者以八陽八陰為兩儀是第一畫為兩儀也兩儀之上各有八卦陽儀八卦陰儀八卦二八一十有六是為上三畫皆八卦也八卦之上各加兩儀者乾兌離震巽坎艮坤各二卦每二卦之上各有一奇一偶為兩儀是自第三畫為八卦八卦之上各有兩儀亦自八分為十六卦四畫皆兩儀也







四畫之上各生一奇一偶而為五畫者三
十二邵子所謂十六分為三十二者是也
又為四象之上各加八卦又為八卦之上
各加四象也


玉齋胡氏曰四象之上各加八卦者第一
畫十六陽十六陰為兩儀第二畫各
八陽八陰為四象四象之上各加八卦
上三畫皆八卦也八卦之上各加四象
者下三畫乾兌離震巽坎艮坤各四卦
上各有兩奇兩偶為兩儀第四畫也每
兩儀之上各有一奇一
偶為四象第五畫也








乾 夬 大有 大壯 小畜 需 大畜 泰



五畫之上各生一奇一偶而為六畫者六十四則兼三才而兩之而八卦之乘八卦亦周於是六十四卦之名立而易道大成矣周禮所謂三易之別皆六十有四大傳所謂因而重之爻在其中矣邵子所謂三十二分為六十四者是也若於其上各卦又生一奇一偶則為七畫者百二十八矣七畫之上又各生一奇一偶則為八畫者二百五十六矣八卦之上又各生一奇一偶則為九畫者五百十二矣九畫之上又

履 兌 睽 歸 中 節 損 臨



各生一奇一偶則為十畫者千二十四矣
十畫之上又各生一奇一偶則為十一畫
者二千四十八矣十一畫之上又各生一
奇一偶則為十二畫者四千九十六矣此
焦貢易林變卦之數蓋以六十四乘六十
四也今不復為圖於此而畧見第四篇中
若自十二畫上又各生一奇一偶累至二
十四畫則成千六百七十七萬七千二百
一十六變以四千九十六自相乘其數亦
與此合引而申之蓋未知其所終極也雖

同人

革

離

豐

家人

既濟

賁

明夷



未見其用處然亦足以見易道之無窮矣

玉齋胡氏曰朱子答袁機仲云第六畫
 者八卦之八卦也又云聖人當初亦不
 恁地思量只是畫一個陽一箇陰只管
 恁地去自一而二二而四四而八而
 十六十六而三十二三十二而六十四
 既成箇物事自然如此齊整皆是天地
 本然之妙元如此但畧假
 聖人手畫出來至哉言也

无妄



隨



噬嗑



震



益



屯




頤




復




姤 大過 鼎 恒 巽 井 蠱 升




訟 困 未濟 解 渙 坎 蒙 師



謙 艮 蹇 漸 小過 旅 咸 遯




否 萃 晉 豫 觀 比 剝 坤




朱子曰凡此非某之說乃康節之說非康節之說乃希夷之說非希夷之說乃孔子之說但當日諸儒既失其傳而方外之說陰相付受以為丹竈之術至於希夷康節乃反之于易而後其說始得復明於世然與今周易次第行列多不同者故聞者創見而不之信但據見行周易緣文生義穿鑿破碎有不勝其杜撰者此啟蒙之書所為作也若能虛心遜志以求其通曉玩之久熟則天地變化之神陰陽消長之妙自將了然於心目之間而有以識其真矣易中七八九六之數向來只從揲著處推起雖亦脗合然終覺曲折太多不甚簡易疑非所以得數之原因者四象次第蓋因一二三四捷徑蓋因一二三四便見六七八九老陽位一便舍九少陰位二便舍八少陽位三便舍七老陰位四便舍六數不過十惟此一義先儒未曾發先儒但說中間進退而已太極兩儀四象八卦生出

次第位置行列不待安排而聚然有序以至于第
四分而為十六第五分而為三十二第六分而為
六十四則其因而重之亦不待用意推排而與前
之三分焉者未嘗不脗合也此之並累三以為乾
連疊三陰以為坤然後以意交錯而成六子又先
畫八卦於內復畫八卦於外以旋相加而為六十
四卦者其出于天理之自然與人為之造作蓋不
同矣四象之名所包甚廣大抵須以兩畫相重
四位成列者為正而一二三四者其位之次也七
八九六者其數之實也其以陰陽剛柔分之者合
天地而言也其以陰陽太少分之者專以天道而
言也若專以地道言之則剛柔又自有太少矣推
而廣之縱橫錯綜凡是一物無不各有四者之象
不但此數者而已矣

伏羲八卦圖



伏羲六十四卦圖



朱子曰自有易以來只有邵子說得此圖如此齊
整如楊雄太玄便零星補湊得可笑若不補又却
欠四分之一補得來又却多四分之一三如潛虛之
數用五只似如今算位一般其直一畫則五也下
橫一畫則為六橫二畫則為七蓋亦補湊之書也
○先天圖真是精微不起於邵子希夷以前元有
只是秘而不傳次第是方士輩所相傳授參同契
中所言亦有些意思○黃氏瑞節曰先天圖與太極
圖同時而出周邵二子不相聞則二圖亦不相通
此勿論也陳瑩中云司馬文正與康節同時友善
而未嘗有一言及先天之學邵伯溫云伊川在康
節時於先天之學非不問不語之也即二先生之
論則先天圖在當時豈猶未甚著耶陳瑩中云先
天之學以心為本其在經世書者康節之餘事耳
又云闡先聖之幽微先天之顯不在康節之書乎
然朱子以前表章尊敬此圖者了翁為有見也

又按會稽嚴氏撰先天圖義蓋取先天之圖圖分
為二十四又取方圖分為二十四其說曰乾一兌
二離三震四巽五坎六艮七坤八大分小分內分
外分橫分直分左分右分正分斜分不差毫釐無
往不合已撮取
入諸圖書類云

天地定位山澤通氣雷風相薄水火不相射八卦相錯
數往者順知來者逆是故易逆數也

雷以動之風以散之雨以潤之日以烜之艮以止之兌
以說之乾以君之坤以藏之

邵子曰此一節明伏羲八卦也八卦相錯者明交相

錯而成六十四也數往者順若順天而行是左旋也
皆已生之卦也故云數往也知來者逆若逆天而行
是右行也皆未生之卦也故云知來也夫易之數由
逆而成矣此一節直解圖意若逆知四時之謂也以
橫圖觀之有乾一而後有兌二有兌二而後有離三
有離三而後有震四有震四而巽五坎六艮七坤八
亦以次而生焉此易之所以成也而圓圖之左方自
震之初為冬至離兌之中為春分以至於乾之末而

交夏至焉皆進而得其已生之卦猶自今日而追數
昨日也故曰數往者順其右方自巽之初為夏至坎
艮之中為秋分以至於坤之末而交冬至焉皆進而
得其未生之卦猶自今日而逆計來日也故曰知來
者逆然本易之所以成則其先後始終如橫圖及圓
圖右方之序而已故曰易逆數也

朱子曰若自乾一橫排至坤八此則全是自然故
說卦云易逆數也皆自己生以得未生之卦若如
圓圖則須如此方見陰陽消長次第震一陽離兌
二陽乾三陽巽一陰坎艮二陰坤三陰雖似稍涉

安排然亦莫非自然之理自冬至至夏至為順蓋
與前逆數者相反皆自未生而反得己生之卦自
夏至至冬至為逆蓋與前逆數者同其左右與今
天文說左右不同蓋從中而分其初若有左右之
勢耳自北而東為左自南而西為右 潛室陳氏
曰卦圖始生只如橫圖自乾一至坤八六十四卦
皆用一倍法兩兩生去雖未生出數可逆加故曰
易逆數也若交一轉遇而為圓圖却從中間數去
不從乾一數而從震四數自震至乾皆得其已生
之卦卦本自乾生至震今却從震數至乾是數往
也既交乾後自巽至坤這一半是元生次序仍是
未生之卦故言知來者逆謂正合圖本生法可逆
數而知也 玉齋胡氏曰邵子云易之數由逆而
成若逆知四時之謂也此論橫圖之序自乾至坤
皆未生之卦也所謂未生者自卦之未畫者推之
蓋太陽未交以前乾未生也自其上生一奇則為

乾而兌猶未生也然其生之勢不容已不必太陽
上生一偶方知其為兌已可即乾而逆推兌于未
生之前知其必為兌矣少陰未交以前離猶未生
也自其上生一奇則為離而震猶未生也然其生
之勢亦不容已不必少陰上生一偶方知其為震
已可即離而逆推震於未生之前知其必為震矣
自巽五至坤八其所推者亦然如自春而推夏知
春之後必為夏自夏而推秋知夏之後必為秋自
秋而推冬知秋之後必為冬所謂若逆知四時之
謂者此也邵子據經文解釋則先圓圖而後及于
橫圖朱子釋邵子之說則先及橫圖而論者誠以
橫圖可以見卦畫之立圓圖可以見卦氣之行所
謂圓圖者其實即橫圖規而圓之耳朱子嘗答葉
永卿云先天圖須先將六十四卦畫作一橫圖則
震巽復姤正在中間先自震復而却行以至於乾
乃自巽姤而順行以至于坤便成圓圖而春夏秋

冬晦朔望晝夜昏旦皆有次第此作圖之大旨也數往知來之說入抵以卦畫之已生者為往未生者為來亦當先以橫圖觀之而後其義可見橫圖之前一截列於前圖之左方者乾一兌二離三震四而運行之序則始於震既有震矣則乾兌離之已生者可見由是自震之初為冬至離兌之中為春分以至乾之末而交夏至焉是皆進而待其已生之卦也天道左行此四卦旋於方之左若順天而行所以數之者豈不如今日追數昨日之順而易乎橫圖之後一截列於圓圖之右方者巽五坎六艮七坤八而運行之序則始於巽方其有巽則坎艮坤之未生亦可見由是自巽之初為夏至坎艮之中為秋分以至坤之末而交冬至焉是皆進而待其未生之卦也天道非右行此四卦行於方之右若逆天而行所以知之者豈不如今日逆計來日之難乎要之數往知來之說以陰陽之節

候次第觀之皆自微而至著以人之推測言之亦因微而識著何則震巽本同居橫圖之中今以橫圖中分而為圓圖則震乃居圓圖之北為陽之始巽乃居圓圖之南為陰之始各相對望而不復同處其中此陰陽之逆順自復始而始其勢已於微而判矣況曰數曰知皆是就人而言亦皆是各據震巽地頭而論以此求之則往來順逆之旨居然可見矣若論其初則易畫之所以成其先後始終不過如橫圖之始乾終坤及圓圖右方自巽至坤之序而已是皆以逆而成也故曰此一節直解圖意若逆知四時之謂也嘗因邵子子牛之說推之以卦分配節便復為冬至子之半願屯益為小寒丑之初震噬嗑隨為大寒丑之半无妄明夷為立春寅之初賁既濟家人為雨水寅之半豐離革為驚蟄卯之初同人臨為春分卯之半損節中孚為清明辰之初歸妹睽兌為穀雨辰之半履泰為

立夏已之初大畜需小畜為小滿已之半大壯大有
為芒種午之初至乾之末交夏至午之半焉
此三十二卦皆進而得夫震離兌乾已生之卦也
姤為春分午之半大過鼎恒為小暑未之初巽并
盡為大暑未之半升訟為立秋申之半困未濟解
為處暑申之半渙坎蒙為白露酉之初師遯為秋
分酉之半咸旅小過為寒露戌之初蹇漸艮為霜
降戌之半謙否為立冬亥之初萃晉豫為小雪亥
之半觀比剝為大雪子之初至坤之末為冬至子
之半焉此三十二卦皆進而得夫巽坎艮坤未生
之卦也二分二至四立總為八節每節各計兩卦
如坤復為冬至无妄明夷為立春同人臨為春分
之類是也如十六氣每氣各計三卦如頤屯益為
小寒至觀比剝為大雪之類是也八節計十六卦
十六氣計四十八卦合之為六十四卦此以卦配
氣者然也

又按周謨問先天卦氣相接皆是左

旋蓋乾接以巽初姤復便是一陰生坤接以巽初
復卦便是一陽生自復卦一陽生十一月盡震四
離三一十六卦然後得臨卦十二月又盡兌二凡
八卦然後得泰卦正月又隔四卦得大壯二月又
隔大有一卦得夬三月又接乾乾接始自始卦一
陰生五月盡巽五坎六一十六卦然後得遯卦六
月又盡艮七凡八卦然後得否卦七月又隔四卦
得觀八月又隔比一卦得剝九月剝接坤十月坤
接復周而復始循環无端卦氣左旋而一歲十二
月之卦皆得其序但陰陽初生各一十六卦而後
一月又歷八卦再得一月至陰陽將極處只歷四
卦為一月又歷一卦遂一并三卦相接其初如此
之疎其末如此之密此陰陽盈縮當然之理與然
此圖于復卦之下書曰冬至子中於始卦之下書
曰夏至午中此固无可疑者獨于臨卦之下書曰
春分卯中則臨卦本為十二月之卦而春分合在

泰卦之下於遯卦之下書曰秋分酉中則遯卦本為六月之卦而秋分合在否卦之下是固有不可曉者朱子答云伏羲易自是伏羲說話文王易自易文王說話固不可交互求合所看先天卦氣盈縮極子細某亦嘗如此理會來而未得其說陰陽初生其氣中固緩然不應如此之疎其後又却如此之密大抵此圖布置皆出乎自然不應无說當更思之愚謂前說以復為冬至子半推之凡二十四氣在諸卦皆各有所屬此朱子所謂伏羲說話也周謨所問十二月卦氣不同朱子所謂文王說話不可交互求合之意也又嘗曰先天圖八卦各自為一節不論月氣先後斯言盡之矣尚何疑之有但朱子謂卦氣盈縮不應无說愚嘗反覆思之竊謂先即內八卦以推十二月之卦獨坎離各八卦无預于月分者坎第三畫陰在陽上離第三畫陽在陰上非陰陽之以次第而生者故不可當月

分若夫震巽陰陽之初生者也一陽一陰在下故各八卦當十一月與五月艮兌陰陽之漸長者也二陽二陰在下故尚八卦當十二月與六月乾坤陰陽之極盛者也三陽三陰之全故乾八卦當正月至四月坤八卦當七月至十月陰陽之初生者宜緩矣又以坎離間之故不期疎而愈疎其浸長者宜稍速矣人踰於坎離之間故視震巽為稍密至於三陽之乾陽氣方出地上溫厚之氣浸浸用事故四陽盛之月皆聚于乾三陰之坤陰氣方入秋初嚴凝之氣浸浸用事故四陰盛之月皆聚于坤雖欲其疎亦不可得也此或可以見卦氣盈縮之由矣

又曰太極既分兩儀立矣陽下交於陰陰上交於陽而四象生矣陽交於陰陰交於陽而生天之四象剛

交於柔柔交於剛而生地之四象八卦相錯而後萬物生焉故一分為二二分為四四分為八八分為十六十六分為三十二三十二分為六十四猶根之有幹幹之有枝愈大則愈小愈細則愈繁

朱子曰程子云聖人始畫八卦三才之道備矣因而重之以盡天下之變故六畫而成卦或疑此說却是聖人始畫八卦每卦便是三畫聖人因而重之為六畫似與邵一分為二而至六十四為六畫其說不同曰程子之意尺云三畫上疊成六畫八卦上疊成六十四耳與邵子說誠異蓋康節此意不曾說與程子程子亦不曾問之故一向只隨他所見去但程子說聖人始畫八卦不知聖人畫八

卦時先畫甚卦此處便曉不得 玉齋胡氏曰此
一節申明八卦相錯而為六十四卦有此圖也
卽子經世演易圖以一動一靜之間為太極以動
靜分兩儀以陰陽剛柔分四象以太陽太陰少陽
少陰分巽坎離艮為天四象以少剛少柔太剛太
柔分巽坎離坤為地四象所謂八卦也動而陽靜
而陰太極生兩儀也一奇為陽儀居圖左方一偶
為陰儀居圖右方左為下故自下而上交于陰而
生陰陽二象右為上故自上而下于陽陽而生剛
柔二象兩儀生四象也陰交于陽而生乾一為太
陽兌二為太陰陽交於陰而生離三為少陽震四
為少陰此四卦者皆自陽儀中來故為天之四象
柔交於剛而生巽五為少剛坎六為少柔剛交于
柔而生艮七為太剛坤八為太柔此四卦者皆自
陰儀中來故為地之四象四象生八卦也八卦相
錯而後萬物生焉一卦之上各加八卦以相間錯

則六十四卦成矣朱子云陰陽是陽中之陰陽剛
柔是陰中之剛柔剛柔以質言是有了箇物見得
剛底柔底陰陽以氣言朱子又釋此以荅袁機
仲云此下四節通論伏羲六十四卦圓圖太極既
分兩儀立矣此一節以第一爻而言左一奇為陽
右一偶為陰所謂兩儀者也今此一奇為左三十
二卦之初爻一偶為右三十二卦之初爻乃以累
變而分非本即有此六十四段也後倣此陽上交
於陰陰下交於陽而四象生矣此一節以第一爻
生第二爻而言也陽下之半上交於陰上之半則
生陰中第二爻之一奇一偶而為少陽太陰矣陰
上之半下交於陽下之半則生陽中第二爻之一
奇一偶而為太陽少陰矣所謂兩儀生四象也太
陽一奇今分為左上十六卦之第二爻少陰一偶
今分為右下十六卦之第二爻太陽太陰其分倣
此而初爻之二亦分為四矣陽交於陰陰交於陽

而生天之四象剛交於柔柔交於剛而生地之四象此一節以第二爻生第三爻言也陽謂太陽陰謂太陰剛謂少陽柔謂少陰太陽之下半交於太陰之上半則生太陰中第三爻之一奇一偶而為艮為坤矣太陰之上半交於太陽之下半則生太陽中第三爻之一奇一偶而為乾為兌矣少陽之上半交於少陰之下半則生少陰中第三爻之一奇一偶而為離為震矣少陰之下半交於少陽之上半則生少陽中第三爻之一奇一偶而為巽為坎矣此所謂四象生八卦也乾一奇今分為八卦之第三爻坤一偶今分為八卦之第二爻此而初爻二爻之四令又分為八卦之第三爻艮坤生於二太故為天之四象離震巽坎生於二少故為地之四象八卦相錯而後萬物生焉一卦之上各加八卦以相間錯則六十四卦成矣然第三爻之相交則生第四爻之一奇一偶於是一奇一偶各

為四卦之第四爻而下三爻亦分為十六矣第四
爻又相交則生第五爻之一奇一偶於是一奇一
偶各為二卦之第五爻而下四爻亦分為三十二
矣第五爻又相交則生第六爻之一奇一偶於是
一奇一偶各為二卦之第六爻而下五爻亦分為
六十四矣蓋八卦相乘為六十四而自三畫以上
三加一倍以至六畫則三畫者亦加一倍而卦體
橫分亦為六十四矣二數殊塗不約而會如合符
節不差毫釐正是易之妙處又曰此段雖通論圖
圖實先以橫圖自兩儀至六十四者明之所謂二
數者指橫圖所生與圓圖所分而言二數相參皆
不約而合也嘗合邵子朱子之說考之邵子以太
陽為陽少陰為陰少陽為剛太陰為柔此四象也
朱子釋之乃曰陽為太陽陰為太陰剛為少陽柔
為少陰其言陽與剛同而言陰與柔異何也邵子
以太陽為乾太陰為兌少陽為離少陰為震四卦

天象四少剛為巽少柔為坎太剛為艮太柔為坤
四卦地四象天地各四象此八卦也朱子釋之乃
曰乾兌艮坤生於二太故為天四象離震坎巽生
於二少故為地四象其言乾兌巽坎同而言離震
艮坤異何也蓋四象八卦之位邵子以陰陽剛柔
四字分之朱子唯以陰陽二字明之其論四象既
殊則論八卦亦異邵子以乾兌離震為天四象者
以此四卦自陽儀中來以巽坎艮坤為地四象者
以此四卦自陰儀中來朱子則以乾兌艮坤生於
太陽太陰故屬其象於天離震巽坎生於少陰少
陽故屬其象於地二者各有不同也但詳玩邵子
本意謂陰陽相交者指陽儀之陰陽剛柔相交者
指陰陽儀中之剛柔是以老交少少交老而生天
地四象其機混然而無間朱子易陽為太陽陰為
太陽剛為少陽柔為少陰二太相交而生天四象
二少相交而生地四象其分聚然而有別朱子之

說雖非邵子本意然因是可以知圖之分陰分陽者以交易而成象之或老或少初不易其分也朱子嘗言文王後天八卦震東兌西為長少相合於正方巽東南艮東北為長少相合於偏方以長少之合為非其偶必若伏羲先天八卦震以長男而合陰長之巽為風雷不相悖艮以少男而合陰少之兌為山澤通氣以長合長少合少為得其偶又言无伏羲底做文王底不成其歸却在伏羲上今邵子說四象之交即文王之說也朱子說四象之交即伏羲之說也觀朱子說實廣邵子未盡之意而觀邵子說者亦庶乎有折衷矣下文朱子復舉邵子說曰震兌在天之陰巽艮在地之陽則於彼處只據邵說而不以已意混之者又可見也

是故乾以分之坤以翕之震以長之巽以消之長則

分分則消消則翕也乾坤定位也震巽一交也兌離坎艮再交也故震陽少而陰尚多也巽陰少而陽尚多也兌離陽浸多也坎艮陰浸多也

玉齋胡氏曰震者長之始雷以動之也歷離兌而乾則長之極而為陰陽之分限矣乾以君之也巽者消之始風以散之也歷坎艮而坤則消之極而為絕陰之翕聚矣坤以藏之也此所以長則分分則消消則翕翕則復為長而循環無端也乾至陽也居上而臨下故曰君以震離兌之陽得乾而有所君宰坤至陰也居下而括終故曰藏以巽坎艮之陰得坤而有所藏宿然謂乾以分之則動而陽者乾也靜而陰者亦乾也乾實分陰陽而无不君宰也朱子嘗言天地之間本一氣之流行而有動

靜耳以其流行之體統而言則但謂之乾而无所
不包以動靜分之然後有陰陽剛柔之别正此意
也夫如是則諸卦皆乾之所君宰聖人特以君言
之造化責陽之大義聖人扶陽之至意昭昭矣乾
坤以陰陽之純定上下之位震一交坎艮再交由
一陽之交以至二陽之交也巽一交坎艮再交由
一陰之交以至二陰之交也故初交為震則陽尚
少再交為離兌則陽侵多也初交為巽則陰尚少
再交為坎艮
則陰浸多矣

又曰無極之前陰含陽也有象之後陽分陰也陰為
陽之母陽為陰之父故母孕長男而為復父生長女
而為姤是以陽起於復而陰起於姤也

或問無極如何說前朱子曰邵子就圖上說循環之意自始至坤是陰含陽自復至乾是陽分陰坤復之間乃無極自坤至始是無極之前問無極之前既有前後須有有無曰本無間斷問先天圖陰陽自兩邊生若將坤為太極與太極不同如何曰他自據他意思說即不曾契勘漁溪底若論他太極中間虛者便是他亦自說圖從中起他兩邊生即是陰根陽陽根陰這箇有對從中出者即無對○進齋徐氏曰無極之前陰含陽也言自巽消而至坤翕靜之妙也有象之後陽分陰也言自震長而至乾分動之妙也陰含陽故曰母孕陽分陰故曰父生朱子云坤復之間乃無極其論密矣又詩曰忽然夜半一聲雷萬戶千門次第開若識無中含象許君親見伏羲來無中含象即坤復之間無極而太極也王齋胡氏曰朱子言就圖說說循環之理者蓋以右一邊屬陰而陰中有陽故自

一陰之姤至六陰之坤皆是以陰而含陽陰主闢其翕聚者所以含畜此陰也左一遯屬陽而陽中有陰故自一陽之復至六陽之乾皆是以陽而分陰陽主闢其發散者所以分布此陰也坤復之間乃為無極蓋以一動一靜之間一無聲無臭之理而已自坤而反觀則推之於前以至於姤故為無極之前自復而順數則引之於後以至於乾故為有象之後四卦之循環蓋未見其終窮也陰為陽之母謂坤為復之母故生復也陽為陰之父謂乾為姤之父故生姤也圖分陰陽復姤為陰陽之起處故曰乾坤為大父母復姤為小父母也

又曰震始交陰而陽生巽始消陽而陰生兌長陽也艮長陰也震兌在天之陰也艮巽在地之陽也故震

兌上陰而下陽巽艮上陽而下陰天以始生言之故
陰上而陽下交泰之義也地以既成言之故陽上而
陰下尊卑之位也乾坤定上下之位坎離列左右之
門天地之所闔闢日月之所出入春夏秋冬晦朔弦
望晝夜短長行度盈縮莫不由乎此矣

朱子曰震始交陰而陽生是說圖圖震與坤接而
陽生也巽始消陽而陰生是說圖圖巽與乾接而
陰生也進齋徐氏曰一氣循環自復至乾為陽
生物之始也故震兌陰上而陽下為交泰之義蓋
主動而言太極之用所以行自始至坤為陰成物
之終也故巽艮陽上而陰下為尊卑之位蓋主靜

而言太極之體所以立也 思齋翁氏曰卯為日
門太陽所生酉為月門太陰所生不但日月出入
於此大而天地之開物雖始於寅至卯而門彌闢
閉物雖成於戌至酉而門已闔一歲而春夏秋冬
一月而晦朔弦望一日而晝夜行度莫不由乎左
右之門所以極贊坎離用功之大也 玉齋胡氏
曰此一節先論震巽艮坎四維之卦而後及於乾
坤坎離四正之位震始交陰而陽生以震接坤言
也至兌二陽則為陽之長巽始消陽而陰生以巽
接乾言也至艮二陰則為陰之長震兌在天之陰
者卯子以震為天之少陰兌為天之太陰惟其為
陰故陰爻皆在上而陽爻皆在下天以生物為主
始生之初非交泰不能故陰上陽下而取交泰之
義巽艮在地之陽者卯子以巽為地之少剛艮為
地之太剛惟其為剛故陽爻皆在上而陰爻皆在
下地以成物為主既成之後則尊卑定故陰下陽

上而取尊卑之位乾坤定上下之位天地之所闢
闢也坎離列左右之門日月之所出入也歲而春
夏秋冬月而晦朔弦望日而晝夜行度莫
不胥此焉出豈拘拘爻畫陰陽之間哉

又曰乾四十八而四分之一分為陰所剋也坤四十
八而四分之一分為所剋之陽也故乾得三十六而
坤得十二也 兌離以下更思之 今按兌離二十八
陽二十陰震二十陽二十八陰艮坎二十八陰二
十陽巽二十陰二十八陽

玉齋胡氏曰乾四十八者內卦為乾自乾至泰八
卦陰陽爻共四十八畫也四分之者以四十八分

為四分每分計十二畫也乾至泰計三十六畫
陽十二畫陰是陽占四分之三內一分為陰所克
也坤四十八者內卦為坤自否至坤八卦陰陽爻
共四十八畫也四分之者以四十八分為四分每
分計十二畫也否至坤計三十六畫陰十二畫陽
是陰占四分之三內一分為所克之陽也故乾得
三十六陽而坤得十二陽者蓋乾固以陽為主而
坤亦以陽為主也可見天道貴陽賤陰聖人扶陽
抑陰之義邵子得之耳程子論復之陽長而曰陰
亦然聖人不言者正與此合兌八卦自履至臨離
八卦自同人至明夷各計二十八陽共五十六陽
各計二十陰共四十陰則其四十者為陰所克也
震八卦自无妄至復計二十陽二十八陰則二十
八為陰所克也艮八卦自遯至謙坎八卦自訟至
師各計二十八陰共五十六陰各計二十陽共四
十陽則其四十者為所克之陽也巽八卦自姤至

升計二十陰二十八陽則二十八者為所克之陽也是兌離震得七十六陽巽艮坎得四十八陽也

又曰乾坤縱而六子橫易之本也

玉齋胡氏曰圓圖南北為縱東西東南西北西南東北為橫八卦對待以立其體易之本也

又曰陽在陰中陽逆行陰在陽中陰逆行陽在陽中

陰在陰中則皆順行此真至之理按圖可見之矣

朱子曰圓圖左屬陽右屬陰坤无陽艮坎一陽巽二陽為陽在陰中逆行乾无陰兌離一陰震二陰為陰在陽中逆行震一陽兌離二陽乾三陽為陽在陽中順行巽一陰坎艮二陰坤三陰為陰在陰中順行此皆以內八卦三畫陰陽言也若以外八卦推之陰陽逆順行亦然右方外卦四節皆首乾

終坤四坤无陽自四艮各一陽逆行而至於乾之
三陽其陽皆自下而上亦陽在陰中陽逆行也左
方外卦四節亦首乾終坤四乾无陰自四兌各一
陰逆行而至於坤之三陰其陰皆自上而下亦陰
在陽中陰逆行也左方外卦四坤无陽自四艮各
一陽順行而至於乾之三陽其陽皆自下而上亦
陽在陽中陽順行也右方外卦四乾无陰自四兌
各一陰順行而至於坤之三陰皆自上而下亦陰
在陰中陰順行也以順逆之說推之陰陽各居本
方則陽自下而上陰自上而下皆為順若陰陽互
居其方則陽自上而下陰自下而上皆為逆此自
然之勢固自有真至之理也 思齋翁氏曰先天
圓圖左陽右陰左三十二卦陽始於復之初九歷
十六變而二陽臨又八變而三陽泰又三變而四
陽大壯又一變而三陽夬而乾以君之陽之進也
始緩而終速其進也以漸所謂陽在陽中順也陽

主升自下而升亦順也復至无妄二十陽明夷至同人二十八陽臨至履亦二十八陽乾至泰三十六陽二十者陽之微二十八陽之著三十六陽之盛陽在北則微在東則著在南則盛亦順也陽順而陰逆不言可知矣陽在右方三十二卦則反是故曰真至之理按圖可見也

又曰復至乾凡百一十有二陽姤至坤凡八十陽始至坤凡百一十有二陰復至乾凡八十陰

玉齋胡氏曰圖之陰陽在兩邊正相等自復至乾居圖之左陽方也故陽多而陰少自姤至坤居圖之右陰方也故陰多而陽少左邊一畫陽便對右邊一畫陰左邊一畫陰便對右邊一畫陽對待以立體而陰陽各居其半也由此觀之天地間陰陽各居其半本無截然為陽截然為陰之理但造化

責陽賤陰聖人扶陽抑陰故于消長之際淑慝之分又不能不致其區別耳豈容以槩論哉

又曰坎離者陰陽之限也故離當寅坎當申而數常踰之者陰陽之溢也然用數不過乎中也此更宜思離當卯坎當酉但以坤為子午可見

西山蔡氏曰此論陰陽往來皆以馴致不截然為陰為陽也以坎離而言離中當卯坎中當酉然離之所生已起於寅震中坎之所生已起於申巽中矣故邵子謂離當寅坎當申也坤當子午乾當午半即離卯坎酉之謂也玉齋胡氏曰坎離陰陽之限者就寅申而言也以四時論之春為陽而始於寅是離當寅而為陽之限秋為陰而始於申是坎當申而為陰之限也數常踰之者離雖當寅而

畫於卯中坎雖當申而畫於酉中是踰寅申之限而為陰陽之溢矣然用數不過乎中者蓋邵子以卯酉為陰陽之溢則其所謂中者是取寅申而不取卯酉也陽之用始於寅陰之用始於申蓋子位陽雖生而未出乎地至寅則溫厚之氣始用事已位陰雖生而不害於陽至申則嚴凝之氣始用事是所謂用數仍不過乎寅申之中也夫以離當寅坎當申推之則乾當巳坤當亥兌當卯辰震當子丑巽當午未艮當酉戌皆數之不及而邵子以為中者也又以離當卯坎當酉坤當子午推之則乾當午坤當子兌當辰巳震當丑寅巽當未申艮當戌亥皆四方之中四隅之會處而邵子以為數常踰之者也此即邵子怕處其盛之意

又曰先天學心法也故圖皆自中起萬化萬事生於

心也

王齋胡氏曰此明圖之所謂太極也圖從中起者心法也心為太極而萬化萬事生於心圖之中亦為太極而儀象卦生於中也林學履問圖皆從中起萬化萬事生於心何也朱子云其中間白處便是太極三十二陽三十二陰只是兩儀十六陰十六陽便是四象八陰八陽便是八卦

又曰圖雖無文吾終日言而未嘗離乎是蓋天地萬物之理盡在其中矣

王齋胡氏曰或問圖雖無文吾終日言而未嘗離乎是何也朱子云一日有一日之運一月有一月之運一歲有一歲之運大而天地之始終小而人物之生死遠而古今之世變皆不外乎此只是一

箇盈虛消息之理本是一箇小底變成大底那大處又變成小底如納甲法乾納甲壬坤納乙癸艮納丙兌納丁震納庚巽納辛坎納戊離納己亦是這箇又如道家以坎離為真水火為六卦之主而六卦為坎離之用自月初三為震上弦為兌望日為乾望為巽下弦為艮晦日為坤亦不外此又云乾之一爻屬戌坤之一爻屬巳留戌就巳方成坎離蓋乾坤是大父母坎離是小父母又如火珠林占得一屯卦則初九是庚子六二是庚寅六三是庚辰六四是戊申九五戊戌上六是戊子亦都是這箇又云先天圖今所寫者是以一歲之運言之推而至於元會運世十二萬九千六百歲亦只是憑地道理小而一日一時亦只是這圈子都從復上推起去朱子之意蓋謂自有先天圖以後如納甲法道家修養法下至火珠林占筮等書莫不自先天圖出此所謂天地萬物之理盡在其中也

邵子嘗自贊云弄環餘暇時來時往又云自從會得環中意閒氣胸中一點無其有得於圖者如此朱子贊之云天挺人豪英邁蓋世駕風鞭霆歷覽無際手探月窟足躡天根間中今古靜裏乾坤可謂形容盡之矣今歷引其言而終之以圖為心法圖皆從中起且以為天地萬物之理盡在其中則其學之得心心之根於理者又豈徒象數云乎哉○按易本義云伏羲四圖三畫六畫橫圖圓圖其說皆出邵氏蓋邵氏得之李之才之才得之穆修修得之希夷先生陳搏所謂先天之學也朱子答黃勉齋書云先天乃伏羲本圖非康節所自作雖无言語而所該甚廣今易中一字一義无不自其中流出以上總論四圖○又云易是互相搏易之義觀先天圖便可見東邊一畫陰便對西邊一畫陽益東一邊本皆是陽西一邊本皆是陰東邊陰畫都自西邊來西邊陽畫都自東邊來始在西是

東邊五畫陽過復在東是西邊五畫陰過互相博
易而成易之變雖多般然此是第一變又云左邊百
九十二爻本皆陽右邊百九十二爻本皆陰陽中
有陰陰中有陽便是陽往交易陰陰來交易陽兩
邊各各相對其實非此往彼來只是其象如此卻
子詩云耳目聰明男子身洪鈞負予不為貧因探
月窟方知物未躡天根豈識人乾遇巽時觀月窟
地逢雷處見天根天根月窟閒來往三十六宮都
是春朱子贊之亦云手探月窟足躡天根池陽何
巨源問詩并贊云莫是說陰陽否朱子答云先天
圖自復至乾陽也自始至坤陰也陽主人陰主物
手探足躡亦無甚意義但復在下始在上上故言手
探下故言足躡天根月窟指始復二卦乃是說他
圖之所從起處三十六宮之說卻子嘗言八卦之
象不易者四乾坤坎離反易者二震反為艮巽反
為兌本是四卦以反易為二卦以六變而成八也

重卦之象不易者八乾坤坎離顯中孚大小過反
易者二十八如屯反為蒙之類本五十六卦反易
只二十八卦以三十六變為六十四也張行成云
天地間唯一無對唯中無對乾坤陰陽之一坎離陰
陽之中顯大過似乾坤之一中孚小過似坎離之
中所以皆無對其餘五十六卦不純乎一與中者
則有對也劉砥問云都是春蓋云天理流行而已
常周流其間之意否朱子云是以上說圓圖○邵
子又詩云天地定位否泰反類山澤通氣咸損見
義雷風相薄恒益起意水火相射既濟未濟四象
相交成十六事八卦相盪為六十四朱子釋之云
此是釋方圖中兩交股底且如西北角乾東北角
坤天地定位便對東南角泰西南角否次乾是兌
次坤是艮是山澤通氣便對次否之咸次泰之損
後四卦亦如此共十六事後四卦謂次兌是離次
艮是坎是水火相射便對次損之既濟次咸之未


欽定四庫全書

卷十五

濟次離是震次坎是巽是雷風相薄便對次既濟之並次未濟之恒是也以上說方圖○易本義云此圖圓布者乾盡午中坤盡子中離盡卯中坎盡酉中陽生于子中極于午中陰生于午中極于子中其陽在南其陰在北方布者乾始於西北坤盡于東南其陽在北其陰在南此二者陰陽對待之數圓於外者為陽方於中者為陰圓者動而為天方者靜而為地也圓圖乾在南坤在北方圖坤在南乾在北乾位陽畫之聚為多坤位陰畫之聚為多此陰陽之各以類而聚也亦莫不有自然之法象焉又云圓圖象天一順一逆流行中有對待如震八卦對巽八卦之類方圖象地有逆无順定位中有對待四角相對如乾八卦對坤八卦之類此則方圓圖之辨也圓圖象天者天圓而動包乎地外方圖象地者地方而靜圓乎天中圓圖者天道之陰陽方圖者地道之剛柔震離兌乾為天之陽地

之剛巽坎艮坤為天之陰地之柔地道承天而行
以地之剛柔應天之陰陽同一理也特在天者一
逆一順卦氣所以運在地者惟主乎逆卦畫所以
成耳以上總說方圓圖○此以上數條啟蒙未盡
述今附見於此亦可互相發矣

文王八卦圖



朱子曰據邵氏說先天圖伏羲所書之易也後天者文王所演之易也伏羲之易初無文字只有一圖以寓其象數而天地萬物之理陰陽始終之變具焉文王之易即今之周易而孔子所為作傳者是也孔子既因文王之易以作傳則其所論固當專以文王之義為主然不推本伏羲始畫之易只從中半說起不識向上根原矣故十翼之中如八卦成列因而重之太極兩儀四象八卦而天地山澤雷風水火之類皆本伏羲畫卦之意而今啟蒙原卦畫一篇亦分兩義伏羲在前文王在後必欲知聖人作易之本則當考伏羲之畫若只欲知今易書文義則但文王之經孔子之傳足矣兩者初不相妨而亦不可以相雜也自初未有畫時說到六畫滿處者邵子所謂先天之學也卦成之後各因一義推說邵子所謂後天之學也今如夫子繫辭說卦三才六位之說即所謂後天者也先天

後天自各自為一義而後天說中取義又不同彼此自不相妨不可執一而廢百也如一索再索之說初間畫卦時也不是恁地只是畫成八卦後便見有此象耳皆所謂後天之學潛室陳氏曰伏羲易以生出為次文王易以反對為次乾坤純體坎離正體順大過小過中孚雜體中之正者此八卦不可反而兩相對餘五十六卦為襍體兩相反以為對于襍然紛錯之中自有井然不紊之統紀者此其所以為妙也

帝出乎震齊乎巽相見乎離致役乎坤說言乎兌戰乎乾勞乎坎成言乎艮萬物出乎震震東方也齊乎巽巽東南也齊也者言萬物之潔齊也離也者明也萬物皆相

見南方之卦也聖人南面而聽天下嚮明而治蓋取諸此也坤也者地也萬物皆致養焉故曰致役乎坤兌正秋也萬物之所說也故曰說言乎兌戰乎乾乾西方之卦也言陰陽相薄也坎者水也正北方之卦也勞卦也萬物之所歸也故曰勞乎坎艮東北之卦也萬物之所成終而所成始也故曰成言乎艮神也者妙萬物而為言者也動萬物者莫疾乎雷撓萬物者莫疾乎風燥萬物者莫熯乎火說萬物者莫說乎澤潤萬物者莫潤乎水終

萬物始萬物者莫盛乎艮故水火相逮雷風不相悖山澤通氣然後能變化既成萬物也

邵子曰此一節明文王八卦也 又曰至哉文王之

作易也其得天地之用乎故乾坤交而為泰坎離交而為既濟也乾生於子坤生於午坎終於寅離終於申以應天之時也置乾於西北退坤於西南長子用事而長女代母坎離得位而兌艮為耦以應地之方也王者

文王也

其盡於是矣

此言文王改易伏羲卦

圖之意也蓋自乾南坤北而交則乾北坤南而為泰
矣自離東坎西而交則離西坎東而為既濟矣乾坤
之交者自其所已成而反其所由生也故再變則乾
退乎西北坤退乎西南也坎離之變者東自上而西
西自下而東也故乾坤既退則離得乾位而坎得坤
位也震用事者發生於東方巽代母者長養於東南
也

朱子曰太極兩儀四象八卦者伏羲畫之法也說
卦天地定位山澤通氣雷風相薄水火不相射八

卦相錯者伏義所畫八卦之位也帝出乎震以下
文王即伏義已成之卦而推義類之辭也上文
兩段說伏義卦位自帝出乎震以下說文王卦位
自神也者以下有兩段前一段乃文王卦位後一
段乃伏義卦位恐夫子之意以為伏義文王所定
方位不同如此然生育萬物既如文王所次則其
方位非如伏義所定亦不能變化既成萬物但後
段却除了乾坤恐着一句神也者妙萬物而為言
引起則乾坤在其中矣蔡季通云伏義八卦是數
之自然文王八卦乃是見之於用或謂先天乃模
寫天地之所以然純乎天理者也後天乃整頓天
地所當然之理合以人事此意固自然先天豈非
人事後天亦是天理之自然顧有明體致用之不
同二者不可相無故夫子釋帝出乎震一章又以
先天說六子之用也邵子以帝出乎震為文王所
定今觀連山首艮以萬物成終成始恐亦古有此

矣。雲莊劉氏曰：八卦之象各一，而水則有二。合先後天卦位觀之，實周於東南西北，以天地之間水為最多也。然坎為水，而兌止為澤者，以坎乃陽水，陽主動，江河之流是也；兌乃陰水，陰主靜，湖海之滙是也。朱先生嘗謂坎水塞其下流，則為兌澤，愚亦謂兌澤疏其隄防，則為坎水，其實一水而已。特以坎陽兌陰，而有水澤之分也。玉齋胡氏曰：乾南坤北，離東坎西者，先天卦位也；乾坤由南北而交坤南乾北，則坤上乾下，故交而為泰也；離坎由東西而交坎東離西，則坎上離下，故交而為既濟也。先天卦乾居午而云生於子者，以乾陽始生於復復子之半也；坤居子而云生於午者，以坤陰始生於姤姤午之半也。午乾之所已成，今下而交坤於子是反其所由生也；子坤之所已成，今上而交乾於午是反其所由生也。故再變而為後天卦，則乾退西北坤退西南也。先天卦離當寅而云終于申者，

中乃坎之位離交坎而終於申也坎當申而云終
於寅者寅乃離之位坎交離而終於寅也東者離
之本位其變則交於坎而向西是東自上而西也
西者坎之本位其變則交於離而向東是西自下
而東也故再變而為後天卦乾坤既退則離上而
得乾位坎下而得坤位也震代父始事而發生於
東方巽代母繼事而長養於東南也先天主乾坤
坎離之交其交也將變而无定位天時之不窮也
故曰應天後天主坎離震兌之交其交也不變而
有定位地方而有常也故曰應地由先天卦而為
後天卦此文王作易所以得天地之用而邵子以
至哉之辭贊之也雖然此邵子朱子之所已言者
而其所未言者尤當竟也先天卦乾以君言則所
主者在乾後天卦震以帝言則所主者又在震何
哉此正夫子發明義文尊陽之意也蓋乾為震之
父震為乾之子以統臨謂之君則統天者莫如乾

而先天卦位宗一乾也此乾方用事則震居東北而緩其用也以主宰謂之帝主器者莫若長子而後天卦位宗一震也此乾不用則震居正東而司其用也先天所重者在正南後天所重者在正東如此則文王改易伏羲卦圖均一尊陽之心可見矣

又曰易者一陰一陽之謂也震兌始交者也故當朝夕之位坎離交之極者也故當子午之位巽艮不交而陰陽猶樛也故當用中之偏乾坤純陽純陰也故當不用之位也

西山蔡氏曰此一節論陰陽以易位為交陽本在上陰本在下艮一陽在上巽一陰在下故云不交

震一陽在下兌一陰在上故為始交坎陽在中離陰在中故為交之極春陽之始故震居之秋陰之始故兌居之夏陽極陰生故離居之冬陰極陽生故坎居之艮一陽二陰巽二陽一陰猶有用乾純陽坤純陰不為用東方為陽主用西方為陰不用故乾坤居西隅艮巽居東隅也乾艮為陽坤巽為陰北為地之陽南為地之陰故乾艮居北而坤巽居南也思齋翁氏曰坎離是乾坤中爻之交在八卦位中只有東西南北四正位位之極好先天則位坎以卯酉後天則位坎離以子午也只此四位陽中有陰陰中有陽皆是義文微意玉齋胡氏曰一陰一陽居正則相對而有交易之義居偏則不對而於交之義无取後天八卦正而對者震兌坎離偏而不對者乾坤艮巽故在東西南北者相對則取其交而在東北東南西北西南者不對則不取其交也自具交者論之震東兌西為交之

始當卯酉之中朝夕之位也離南坎北為交之極當子午之位天地之中也自其不交者論之巽艮居南北之東北於乾坤陰陽為尤襍故巽稍向用而艮全未用所以為當用中之偏乾坤居南北之西北於巽艮為陰陽之純所謂父母既老而退處於不用之地也

又曰兌離巽得陽之多者也艮坎震得陰之多者也
是以為天地用也乾極陽坤極陰是以不用也

雲莊劉氏曰兌離巽陰卦宜多陰而反多陽艮坎震陽卦宜多陽而反多陰何也蓋三男乃坤求於乾各得乾一陽而成本皆坤體故多陰三女乃乾求於坤各得坤一陰而成本皆乾體故多陽多陽多陰者各得乾坤之一體極陰極陽者乃乾坤之全體乾坤雖不用而六卦之用无往而非乾坤之

用矣。○玉齋胡氏曰：此承上文而言六子得陰陽之多，而致用乾坤陰陽之極而不用也。陰卦多陽，故兌離巽得陽之多；陽卦多陰，故艮坎震得陰之多。是以各司天地之用，而生成萬物也。至於乾極陽，坤極陰，極則止而不復用矣。然六子之用，即乾坤之用也。

又曰：震兌橫而六卦縱易之用也。嘗考此圖而更為

之說曰：震東兌西者，陽主進，故以長為先而位乎左；陰主退，故以少為貴而位乎右也。坎北者，進之中也；離南者，退之中也。男北而女南者，互藏其宅也。四者皆當四方之正位而為用事之卦。然震兌始而坎離

終震兌輕而坎離重也乾西北坤西南者父母既老而退居不用之地也然母親而父尊故坤猶半用而乾全不用也艮東北巽東南者少男進之後而長女退之先故亦皆不用也然男未就傳女將有行故巽稍向用而艮全未用也四者皆居四隅不正之位然居東者未用而居西者不復用也故下文厯舉六子而不數乾坤至其水火雷風山澤之相偶則又用伏羲卦云

玉齋胡氏曰前論先天八卦有縱橫為易之本故此論後天八卦亦有縱橫為易之用也先天八卦圓圖乾南坤北于象為縱也離東坎西震東北巽西南兌東南艮西北于象皆為橫矣後天八卦圖震東兌西於象為橫也離南坎北艮東北巽東南坤西南乾西北于象皆為縱矣先後天縱橫不齊者蓋先天對待以立其本而所重在乾坤後天流行以致其用而所重在震兌先天有乾坤之縱以定南北之位然後六子之橫布列于東西者倚之以為主是相為對待以立本也後天有震兌之橫以當春秋之分然後六卦之縱其成全於冬夏者資之以為始是迭為流行以致用也本立用行先後天所以可相有而不可相無也故曰上文既以震兌離坎交而當用巽艮不交而未用乾坤純而不用又統論六子致用乾坤不用至此則并乾坤皆以為易之用何也蓋就後天八卦論乾坤則

終於不用若合先後天八卦而論先天所以立易之本後天所以致易之用則皆謂之入用矣况後天乾坤雖云不用而有六子以致用則用者雖在六子不用而主其用者實在乾坤豈荒於无用哉故亦皆以用言也自震東兌西至坎離重也為一節專論震兌離坎居四方之正位而為用事之卦震居東為陽主乎進兌居西為陰主乎退而東西之位以定離居南為退之中坎居北為進之中而南北之位以成離得乾位以陰卦居陽坎得坤位以陽卦居陰男女之互藏其宅也震當生育之始兌當收成之始離當長養之終坎當歸藏之終當其始者其責輕當其終者其責重也自乾西北至不復用也為一節專論四隅之卦乾坤以父母之老不復用巽艮以男女之長少而未用坤西南猶牛用者謂其當長養收成之交母道當親也乾西北全不用者謂其當嚴凝主靜之後父道常尊

也艮東北巽東南者以進退之先後定之男未就傳少而未習其事女將有行長而可以任其事也故巽稍用而艮全未用也然四卦固皆四隅而居東方生育之位者特未用居西方收成之位者全不用矣自故下文歷舉六子以下為一節是總上兩節論六子致用而乾坤不用也謂之曰不數乾坤者以致用在六子故不復及之耳而其下文仍用伏羲卦數者沿流溯源不容以後天而遺先天也問且如雷風水火山澤自不可喚做神朱子云神也者乃其所以動所以撓者也又云水火相逮一段與上面水火不相射同又自是伏羲卦又云上言六子用文王八卦之位者以六子之主時成用而言故以四時為序而用文王後天之序下言六子用伏羲八卦之位者推六子之所以主時成用而言故以陰陽交合為義而用伏羲八卦之序蓋陰陽以其偶合即六子之用行所以能變化盡

成萬物也蓋後天八卦即四時進退為序先天八卦以陰陽交合為義四時進退者用之所以行也故不以卦位之非其偶為拘陰陽交合者體之所以立也故必以卦位之得其偶為主要之先天以其偶合而八卦之體立則後天雖不以其偶合而六子之用自行此變化既成萬物固歸之文王卦次而所以變化既成萬物者實歸之伏羲卦次也次而所以變化既成萬物者實歸之伏羲卦次也次而所以變化既成萬物者實歸之伏羲卦次也次而所以變化既成萬物者實歸之伏羲卦次也

能變化既成萬物與

乾健也坤順也震動也巽入也坎陷也離麗也艮止也兌說也

程子曰凡陽在下者動之象在中者陷之象在上止

之象陰在下者入之象在中者麗之象在上說之象

王齋胡氏曰此以八卦之性情為言一陽起於二陰之下則為動墮於二陰之中則為陷終於二陰之上則為止一陰伏於二陽之下則為入附於二陽之中則為麗見於二陽之上則為說純於陽為健純於陰為順也

乾為馬坤為牛震為龍巽為雞坎為豕離為雉艮為狗

兌為羊

此遠取諸物之象

乾為首坤為腹震為足巽為股坎為耳離為目艮為手

兌為口

此近取諸身之象

朱子曰伏羲畫八卦只此數畫談盡天下萬物之理學者於言上會得者淺於象上會得者深王輔嗣伊川皆不信象伊川說象只似譬喻樣說郭子和云不獨是天地雷風水火山澤謂之象只是卦畫便是象亦說得好鄭東卿專取象如以鼎為鼎革為爐小過為飛鳥亦有義理但畫欲如此牽合附會便疎脫學者須先理會得正當道理了然後於此等些小零碎處收拾以相資並不為無補程沙隨以井卦有井谷射鮒一句遂說井有蝦蟆之象其穿鑿一至於此某嘗作易象說大率以簡治繁不以繁御簡然易之取象各有不同却亦有難理會者如乾為馬而乾之卦却專說龍之類是也

或問孔子專以義理說易如何曰自上古世流傳至此象數已分明不須更說故孔子只於義理上程伊川亦從孔子令人既不知象數但知孔子說只是說得半截不見上面來歷

乾天也故稱乎父坤地也故稱乎母震一索而得男故謂之長男巽一索而得女故謂之長女坎再索而得男故謂之中男離再索而得女故謂之中女艮三索而得男故謂之少男兌三索而得女故謂之少女

今按坤求於乾得其初九而為震故曰一索而得男乾求於坤得其初六而為巽故曰一索而得女坤再

求而得乾之九二以為坎故曰再索而得男乾再求而得坤之六二以為離故曰再索而得女坤三求而得乾之九三以為艮故曰三索而得男乾三求而得坤之六三以為兌故曰三索而得女

玉齋胡氏曰朱子云乾索於坤而得女坤索於乾而得男初間畫卦時不是恁地只是畫卦後便見有此象耳愚謂三男陽也乾之似也乃歸之於坤求而後得三女陰也坤之似也乃歸之於乾求而後得何也蓋三男本坤體各得乾一陽而成此陽根於陰故歸之坤也三女本乾體各得坤一陰而成此陰根於陽故歸之乾也邵子云母孕長男而為復父生長女而為姤陰陽互根之義可見矣

凡此數節皆文王觀於已成之卦而推其未明之象
以為說邵子所謂後天之學入用之位者也

玉齋胡氏曰此總論乾健也以下四節之旨也○
嘗合先後天之見而參之圖書矣伏羲先天之易
固以河圖為本而其卦位未嘗不與洛書合且以
乾南兌東南則老陽四九之位也離東震東北則
少陽二八之位也巽西南坎西則少陽三七之位
也艮西北坤北則老陰一六之位也其卦實與洛
書合焉文王後天之易雖但本之伏羲然亦未嘗
不與河圖合且以坎離當南北之正子午之中則
兩卦各當夫水火之一象離當地二天七之火而
居南坎當天一地六之水而居北外此六卦則每
卦共當一象震者木之生當天三之木於東巽者
木之成當地八之木於東南兌者金之生當地四

之金於西乾者金之成當天九之金於西北艮者
土之生當天五之土於東北坤者土之成當地十
之土於西南坤艮所以獨配夫中宮之五十者以
土實寄旺於四季无乎不在故配夫中宮數耳其卦
實與河圖合焉原其初伏羲但據河圖以作易未
必預見於書文王但據先天八卦以為後天八卦
未必追考於圖而方位既成自然相符合於所以見
天地之間河圖自然之數其與聖人心意之所為
自有不期合而合者此理
之所必同也不可不察焉



性理大全書卷十五